

Surat khabar: Utusan Borneo (Tempatan)

Hari/Tarikh: 21/9/2013

Muka surat: 14

Tajuk : 200 Belia Jayakan Persidangan Kepimpinan Belia Antarabangsa.

200 belia jayakan Persidangan Kepimpinan Belia Antarabangsa

MIRI: Seramai 200 belia dari dalam dan luar negeri menjayakan Persidangan Kepimpinan Belia Antarabangsa di Hotel ParkCity Everly yang dianjurkan bersama SMK Lutong dan IBS College, baru-baru ini.

Bertemakan 'Charting Tomorrow's World With Integrity,' persidangan dari 13 hingga 15 September lalu bertujuan memupuk kesedaran belia tentang kepentingan integriti dalam kepimpinan dan penguasaan disiplin.

Penganjuran persidangan buat tahun kedua itu juga diharap dapat memperkayakan ilmu, kemahiran dan kecekapan golongan belia dalam memainkan peranan mereka sebagai pemimpin masa depan.

Selain Miri, persidangan turut disertai oleh belia dari Semenanjung Malaysia, negara jiran Brunei Darussalam dan Thailand.

SMK Lutong merupakan sekolah perintis dalam menganjurkan persidangan itu yang melibatkan aktiviti-aktiviti seperti bengkel, pembentangan projek, persembahan kebudayaan dan pertandingan pidato.

Penganjur turut menjemput Pengerusi SIDMA College Profesor Dr Morni Kambrie, Profesor Dr Mus Chairil dari Universiti Malaysia Sarawak (UNIMAS), Dr Jireh dari IBS College, Serena Dass dan Chan Kwok Mow dari Universiti Curtin Sarawak untuk menjayakan persidangan berkenaan.

Semasa pertandingan pembentangan projek, peserta menggunakan kreativiti dan kerja berpasukan untuk mengetengahkan kesan teknologi maklumat dan komunikasi (ICT) terhadap gaya hidup, keluarga, perhubungan dan kesihatan.

Peserta menggunakan lakaran, pembentangan 'Power-

point,' nyanyian dan 'choral speaking' dalam menyampaikan mesej mereka.

Majlis makan malam bertema 'International Goodwill Nite' turut dianjurkan sempena persidangan tersebut yang dirasmikan oleh Datuk Bandar Miri, Lawrence Lai dan dihadiri oleh Rohaida Abdul Manap dari Kementerian Pendidikan Malaysia, Pegawai Pelajaran Miri Rosnani Yunus dan Pengetua SMK Lutong Marcus Hugo Matu Lejau.

Dalam ucapannya, Lawrence bangga dengan penganjuran aktiviti itu yang turut membantu mempromosikan persefahaman dan kerjasama antara belia.

Pihak penganjur berterima kasih kepada Ambank, Bank Rakyat, RHB bank, IBS College, Janmi School Shop, Fast Tech Trading dan Perdana Trading atas tajaan menjayakan aktiviti tersebut.



BERMANFAAT: Marcus (duduk tengah) bersama tetamu jemputan dan para pemenang Persidangan Kepimpinan Belia Antarabangsa di Miri, baru-baru ini.